



18. august 2021

UKA 2021/168

UPA 2022/168

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Tungaviusumik inatsisissaq pillugu isumalioqatigiisitap unitsinnissaa, kiisalu isumalioqatigiisitami sulinerup unitsinneqarnissaa pillugu Inatsisartut aalajangiineranniit atuutilersussamik Naalackersuisut peqquneqassasut Inatsisartut aalajangiiffigisassaattut siunnersuut.**

(Inatsisartunut ilaasortaq Aqqalu C. Jerimiassen, Atassut)

### **Tungavilersuut**

Siunissami namminiilivinnissaq takorluugaavoq nuannersoq. Taamaattorli nassuerutigisariaqarparput ullumikkut tungaviusumik inatsiseqalernissaq pillugu isumalioqatigiissitaq kusassaataannaasoq, namminiilivinnissamut suliaqarnertut taallugu neriulersitsiniartussiaq.

Nassuerutigisariaqalerparput pappilissamik ukiumoortumik 5 mio. Kr.-nik akilimmik suliaqarnikkut namminiilivinnissamik pilersitsinavianngitsoq. Namminiilivinnissaq angunetserneqarsinnaavoq ullumikkut aningaasaatigut atorluaagutta. Taamanikkussamullu akissaqalersimalluta, pisinnaalersimallutalu inississimaleriarutta taamanikkussamut pissutsinut tulluuttumik tungaviusumik inatsisiliorniarneq nangeqqinneqakuttooqqikkumaarpoq.

Pivusorsiornerulertariaqarpugut. Inuinuku pisinnaanngorsartariaqarigut, imminnut napatissinnaanngorsarlugit, namminersorlutik inuullutik, namminersortutullu suliffeqarfinnik aallartitsisinnaanngorsarlugit. Uagut qulaaniit suaaruteqarnitsiguunngitsoq, inuilli peqqissut, toqqissisimasut namminiilivinneq pilersittussaagaat. Namminiilivinnerup inuit nammineernerusut pilersikkunnaangilai. Inuinuku nammineersinnaanngorsimasut namminiilivinnissaq pilersitassaat. Tungaviusumik inatsisip namminiilivinneq imminnullu napatinneruneg pilersinnavianngilaa. Inuiaalli nammineersinnaalersimasut imminnut napatittut tungaviusumik inatsisiliortussat.

Nassuerutigisariaqalerparpullu tungaviusumik inatsisiliorniarnermut isumalioqatigiissitaq iluatsinngitsoq. Piffissaq sivitsorpoq sulilu takussutissaasumik saqqummiussisimanatik, naak ukiumut miliuunerpassuarnik aningaasartuuteqarfiguaraluaripput. Kinguarteqattaaginnavittumut taamatut aningaasarpassuarnik atuiinnavissinnaajunnaarpugut. Taamaattumillu Naalackersuisut inatsimmik allannguutissamik suliaqqaqullugit peqquneqarnissaannik siunnersuuteqarpugut, taakku miliuunerpaaluit aningaasanut inatsimmut pituttoqqajunnaarsikkumallugit. Taakku aningaasat allanut pivusorsiorturnut atortigit.



**Aningaasatigut ingerlatsinikkullu pisortanut kingunerisassai:**

2017-mili ukiumut 5mio. Kr.-it tunngaviusumik inatsisiliornissaq pillugu isumalioqatigiisitamut illikartinneqartarsimapput. AIS2022 malillugu pilersaarutigineqarpoq 2022-mi 5,7mio. Kr.-t atorineqartussanngortinneqaralarput. Isumalioqatigiisitalli unitsinnissaa aalajangerneqassappat naatsorsuutigineqassaaq 5,7mio. Kr. Sipaarutigineqassasut 2022-iinnarmi. Taamaattorli isumalioqatigiisitap unitsinneqarneranut atatillugu atorfinitsinneqarsimasunut tunngatillugu isumaqatigiissuteqarnikkut pituttorsimaffiusut atuukkumaarput, taamaalillunilu sipaarutaasussatut naatsorsuutigineqarsimasut annikinnerularlutik.

**Namminersortunut aningaasarsiornikkut allaffissornikkullu kingunerisassai:**

Soqanngilaq.

**Innuttaasunut aningaasarsiornikkut allaffissornikkullu kingunerisassai:**

Soqanngilaq.